

von einer Columnen zu der andern/ zwischen den obersten Columnen/ sol ein viertheil kleiner sein dann die obern Columnen/ der vrsach halb/ das die so oben auff dem ersten Boden sich erspacieren/ vnd auff vnd nider gehn/ von Gewerbs Leuthen mit gesehen werden. Die Epistylen/ Sophori vnd Coronen/ sollen nach der manier der Columnen in irer rechten Symmetri abgetheilet werden/ als wir im dritten Buch gnugsam angezeigt haben. Weiter mögen solche Pallast in schöner gestalt der massen geordnet werden/ als wir den Pallast Julie erbawet haben mit Fenster gestellē/ welcher Pallast in folgender Proportion vnd Symmetri gesetzt ist/ das inner Gewelb zwischen den Columnen ist 120 Werckschuch lang/ vnd sechzig Werckschuch breit/ der Schopff oder Porticus vmb das mitler Gewelb zwischen der Mawren vnd Columnen/ ist gewesen zwentzig Werckschuch breit/ aber die Seulen haben in aller ihrer ganzen höhe sampt den Capiteelen fünffzig Werckschuch gehalten/ vnd fünff Werckschuch in der dicke/ mit iren Stockpfeilern so die Schwibbogen tragen/ der Parastaten zwentzig Schuch hoch vnd anderhalb Schuch breit/ von welchem die Balckē vnderhalten werden/ darauff der Boden der vorschöpff gelegt wird/ auff solche Parastaten werdē andre Schwibböge Pfeiler gesetzt achtzehen Werckschuch hoch/ vnd zwen Werckschuch breit/ vnd einen Werckschuch dick/ welche widerumb die Balcken tragē/ sampt dē Canteriē vnd überschopff der nidrigē Dachung vnderhalb dē Gewelb. Die vberigen spacien zwischen dē Parastaten vnd Columnē seind dem Liecht vnd Fenstern zu verordnet/ die Columnē sind in der breit Testudinis oder Gewelbs/ mit beide Eckcolumnē zu der rechten vnd linckē seitē vier/ vnd nach der leng so dē Foro am nechsten mit iren Eckseulen acht/ von der andern seiten sechß/ sampt dē Eckseulen/ dann die zwo mittlern Columnē sind nit gesetzt wordē/ damit solche nit verhindertē das ansehē des Haus Augusti/ so in mitler seitē der Wand dises Pallasts erbawē ist/ gegen der mit Fori/ vnd gegē dem Tempel Iouis gericht. Es ist auch ein Tribunal oder Körlein in disem Pallast halb Zirckelrond mit geringer krümme formiert/ solcher halber Zirckelkreis ist zuuorderst ausserhalb im begriff sechß vñ zwentzig Werckschuch/ aber inerhalb auff fünffzehē Schuch geordnet/ damit die so vor dē Magistrat handleten/ die Handthierung in iren gewerbs hendlē nit hindertē. Auff den Columnen sind herumb gelegt grosse Trammē von drey Schuch dick Balcken zusammen gesetzt/ solche widerkehrē von den dritten inneren Columnen zu den Antē so von Pronao hinfür gesetzt werden/ vnd sich erstreckē zu beyder seit der Lincken vñ Rechte/ bis das sie solche auf geladene Ronde erreichē/ auff solche Balcken gerad